



5. Ordre du jour (suite)

► **M. Jean-Claude Juncker**, *Premier Ministre, Ministre d'État*.- Här President, fir d'Éischt wëll ech dem Här Lux Merci soe fir säi Budgetsrapport, dee schrëftlechen an dee mëndlechen.

Zweetens war et u sech virgesinn, dass ech am Kader vun dëse Budgetsdebatte méi eng breet,

global Vue vun der Regierung géif presentéieren. Dat war virgesi fir muer de Mëtteg. Dunn ass mer gesot ginn, d'Budgetsriede vun der Regierung misste muer de Moie stattfannen, well den Här Finanzminister muss op den ECOFIN muer de Mëtteg fueren, deen exzeptionell aberuff ginn ass. Ech hunn Telefonskonferenzen haut a muer ëm déi Zäit, wou ech hätt solle schwätzen, vun dem Eurogroup.


Ech wollt dofir d'Chamber ëm Entschëllegung bidden, dass ech déi Ried dann net kann halen an dass ech och en Donneschdeg, well dann ass Eurogroup a Conseil européen, net kann den Debatte bäiwunnen, wat ech net normal fannen, mä d'europäesch Agenda ass déi, déi se ass. Ech wollt mech dofir ausdrécklech beim Parlament entschëllegen, dass et net an de Genoss vu mengen Erkenntnisser kann trieden.

► **M. le Président**.- Merci dem Här Statsminister.

Domadder si mer dann och um Enn vun eiser Sitzung vun haut de Mëtteg ukomm. D'Chamber kënnt muer um néng Auer nees zesummen.

D'Sitzung ass opgehewen.

(Fin de la séance publique à 15.43 heures)



SÉANCE 13

MERCREDI,
12 DÉCEMBRE 2012

Présidence: M. Laurent Mosar, Président

Sommaire

- 6497 - Projet de loi portant modification
 - de la loi modifiée du 4 décembre 1967 concernant l'impôt sur le revenu;
 - de la loi modifiée du 16 octobre 1934 concernant l'impôt sur la fortune;
 - de la loi générale des impôts modifiée du 22 mai 1931 («Abgabenordnung»);
 - de la loi modifiée du 30 juin 1976 portant 1. création d'un fonds pour l'emploi; 2. réglementation de l'octroi des indemnités de chômage complet;
 - de la loi modifiée du 22 décembre 2006 promouvant le maintien dans l'emploi et définissant des mesures spéciales en matière de sécurité sociale et de politique de l'environnement;
 - de la loi modifiée du 12 février 1979 concernant la taxe sur la valeur ajoutée;
 - de la loi modifiée du 30 juillet 2002 déterminant différentes mesures fiscales destinées à encourager la mise sur le marché et l'acquisition de terrains à bâtir et d'immeubles d'habitation
 - Rapport de la Commission des Finances et du Budget: M. Gilles Roth (M. Paul-Henri Meyers interviert)
- 6500 - Projet de loi concernant le budget des recettes et des dépenses de l'État pour l'exercice 2013
 - Exposé: M. Luc Frieden, Ministre des Finances

Au banc du Gouvernement se trouvent: Mmes Marie-Josée Jacobs, Mady Delvaux-Stehres, MM. Luc Frieden, François Biltgen, Mars Di Bartolomeo, Jean-Marie Halsdorf, Nicolas Schmit, Mme Françoise Hetto-Gaasch et M. Romain Schneider, Ministres.

(Début de la séance publique à 9.01 heures)

► **M. le Président**.- Ech maachen d'Sitzung op.

Huet d'Regierung eng Kommunikatioun ze maachen?

(Négation)

Dat schéngt net de Fall ze sinn.

Mir fänken de Moien u mat der Presentatioun vum Rapport vun der Finanzkommissioun iwwert de Projet de loi 6497 iwwert d'Fiskalmesuren. D'Wuert huet elo de Rapporteur vum Projet de loi, den honorabelen Här Gilles Roth.

1. 6497 - Projet de loi portant modification

- de la loi modifiée du 4 décembre 1967 concernant l'impôt sur le revenu;

- de la loi modifiée du 16 octobre 1934 concernant l'impôt sur la fortune;

- de la loi générale des impôts modifiée du 22 mai 1931 («Abgabenordnung»);

- de la loi modifiée du 30 juin 1976 portant 1. création d'un fonds pour l'emploi; 2. réglementation de l'octroi des indemnités de chômage complet;

- de la loi modifiée du 22 décembre 2006 promouvant le maintien dans l'emploi et définissant des mesures

spéciales en matière de sécurité sociale et de politique de l'environnement;

- de la loi modifiée du 12 février 1979 concernant la taxe sur la valeur ajoutée;

- de la loi modifiée du 30 juillet 2002 déterminant différentes mesures fiscales destinées à encourager la mise sur le marché et l'acquisition de terrains à bâtir et d'immeubles d'habitation

Rapport de la Commission des Finances et du Budget

► **M. Gilles Roth** (CSV), *rapporteur*.- Här President, Dir Dammen an Dir Hären, Dir Häre Ministeren, de Statsminister huet de 5. Mee 2010 hei an der Chamber bei der Regierungserklärung iwwert d'Lag vun der Natioun gesot: „Richtig bleibt: Fir d'Éischt muss mer spueren an d'Ausgabe méi niddreg halen. Mä zur Budgetkonsolidéierung gehéiert och d'Recettësäit. An d'Ausgabe muss falen; dat ass d'Prioritéit. D'Recettë muss sech aus Solidaritéitsgrënn no uewe bewegen; an dat ass leider eng Noutwendegkeet.“

Här President, d'Ofbremse vum Wirtschaftsmotor huet eis Statsfinanzen iwwert déi leschte Joren an den Déséquilibre bruecht. D'Kris, déi am Joer 2008 iwwer eis eragebrach ass, huet sech op villen Niveaue bemierkbar gemaach: um Aarbechtsmaart, an Aktivitéitsberäicher, déi fir eist Land wichteg sinn, an natierlech um Niveau vun den öffentleche Finanzen. D'Äntwert op dës Kris konnt a wäert dofir och keng eenzel oder isoléiert sinn. Si ass villschichteg.

Eng ganz Rei vu Mesurë si schonns geholl ginn. Virun zwee Joer hu mir en éischte Pak vu Steuer-moossname gestëmmt, deen deemools ronn 230 Milliounen Euro méi an d'Statskeess

bruecht huet. De Gesetzesprojet 6497, deen haut der Chamber virläit, versicht eng weider Äntwert um steuerleche Plang ze ginn.

Dës Moossname goufen zum Deel an der Regierungserklärung zur Lag vun der Natioun Enn Abrëll dëst Joer schonns ugekënnegt. Anerer goufe bei der Presentatioun vun dem Statsbudget fir 2013 am Oktober annoncéiert. A schliesslech dréit de Gesetzesprojet enger Rei vun Amendementen zum Budget Rechnung, déi ufanks November presentéiert goufen.

Insgesamt bréngt dës ganze Pak ee Plus u Recettë fir de Stat vu 400 Milliounen Euro pro Joer. Dës Steuerpak ass ee vu ville Schrëtt, fir d'Finanze vum Stat mëttelfristeg nees an den Équiliber ze bréngen. De Plus u Steuerrecettë kann een dofir net lassgeléist kucke vun den néidegen Aspierungen um Niveau vun den Ausgabe vum Stat, Aspiermoossnamen, déi schonns gemaach goufen an där an Zukunft och weider nach geplangt sinn.

All dës Aspierungen a Steieren dénge kuerz- a mëttelfristeg der Reduktioun vun eisem Statsdefizit, laangfristeg an doriwwer eraus der Begrenzung an dem Ofbau vun eiser Statsschuld. Ésou wäit zum finanziellen a wirtschaftleche Kontext.

Här President, konkret begräift de Steuerpak folgend Punkten:

Éischtens, mat dësem Gesetzesprojet féiere mir een neie Spätzesteiersaz vu 40% op dem Akommes vu Privatpersounen an. Dës Spätzesteiersaz ersetzt net dee vun 39%, wéi en haut existéiert, et gëtt vill méi eng zousätzlech Steiertranche vu 40% an de Steiertarif agesat.

Den neie Spätzesteiersaz fänkt bei engem besteebaren Akommes fir d'Steierklass 1 bei 100.000 Euro pro Joer un; an der Steuerklass 2, also bei enger Koppel, ab 200.000 Euro. Bei Loun- a Gehaltsempfänger entsprécht dat iwwert den Domm gepéilt engem Bruttomonnatsloun vu ronn 10.000 Euro an der Steuerklass 1 an 20.000 Euro an der Steuerklass 2.

Insgesamt soll d'Erhéijung vun dem Spätzesteiersaz ee Plus vun 18,5 Milliounen Euro pro Steierjoer bréngen. D'Äféierung vun dem neie Spätzesteiersaz vu 40% bréngt wuel manner zousätzlech Suen an d'Statskeess wéi d'Erhéijung vum Spätzesteiersaz vun 38% op 39% vu virun zwee Joer. Dës huet zënterhier all Joers 40 Milliounen Euro Mehreinnahme pro Joer bruecht.

Den Ennerscheid huet ganz einfach domadder ze dinn, dass den neie Spätzesteiersaz eréischt spillt fir dat versteierbart Akommes, wat iwwer 100.000 Euro an der Steuerklass 1 respektiv 200.000 Euro an der Steuerklass 2 spillt (veuillez lire: erausgeet). Vun 83.600 Euro bis 200.000 Euro versteiert Joresakommes bei enger Koppel géllt nämlech weiderhin de Spätzesteiersaz vun 39%.

Nun, wien a wéi vill Leit sinn dann elo vun deem neie Spätzesteiersaz vu 40% konkret be-trafft? Meeschtens sinn dat Leit aus der Steuerklass 2, wou méi wéi ee Revenu am Stot ass. Gekuckt op d'Joer 2012 dierfte ronn 12.350 Stéit, meeschtens Koppelen, ee versteierbart Akommes vun iwwer 200.000 Euro hunn. Dat si ronn 10.200 Résidenten, also Leit, déi hei am Land wunnen, an 2.150 Netrésidenten, déi awer hei am Land Steiere bezuelen. Derzou kommen all déi Leit aus der Steuerklass 1, déi méi wéi 100.000 Euro versteierbart Joresakommes hunn.

De Spätzesteiersaz gëtt ab dem 1. Januar 2013 beim Ausbezuere vun de Gehälter an de Léin applizéiert. D'Lounsteuer gëtt jo bekanntlech direkt abehalen an dann an d'Statskeess ofge-

fouert. Bei aneren Akommeszorten, wéi zum Beispill de Revenu vu Fräiberuffler, Loyerer, gëtt eréischt am Kader vun der Steiererklärung ofgerechent, an doduerch ginn dës Steiergel-der méi spéit bezuelt.

Här President, d'Erhéijung vun dem Spätzesteiersaz ass hei zu Lëtzebuerg éischter rar iwwert déi leschte 25 Joer gekuckt. Mä „crise oblige“ an nom Motto „wie méi huet, dee muss och méi bezuelen“ hu mir missen elo zwou moderat Upassungen no uewen iwwert déi leschten zwee Joer maachen. De Spätzesteiersaz gouf zënter 1990 an deene leschten 20 Joer nämlech kontinuierlech erofgesat, an zwar ab '91 vu 56% op 50%, dunn '98 op 46%, 2001 op 42% respektiv 2002 op 38%. Mat dem neie Spätzesteiersaz bleift d'Verdeeel vun der Steierlaascht tëscht de Privatpersounen awer weiderhi sozial ofgefiedert. Breet Schëlleren droen ebe méi.

2,5% vun de Stéit hei am Land bezuele 37% vun de Steieren, also méi wéi en Drëttel vun dem gesamte Steieropkommes vun de Privatpersounen. 5% vun de Stéit bezuele ronn 50% vun der Akommes- a Lounsteuer a 40% vun de Stéit bezuelen hei zu Lëtzebuerg keng Steieren.

Wéi sti mir dann elo an dem internationale Verglach? Dee sougenannten „ouvrier moyen“ - dat ass eng international Norm, fir d'Steierlaascht ze präiwen - mat engem Joresver-déngscht zu Lëtzebuerg vun 52.000 US-Dollar - déi entspreche ronn 40.000 Euro -, bestuet mat zwee Kanner, behält no Steieren a Sozialtransferte wéi Kannergeld, Steierbonien, Familljenzouwendunge ronn 99% vu sengem Bruttoloun als Netto an der Täsch. Den duerchschnëttlechen OCDE-Wäert läit hei bei 85%, an der Europäescher Unioun souguer nëmme bei 83%.

Am Verglach zu dem Ausland läit den neie Spätzesteiersaz vu 40% bei 100.000 Euro Joresakommes an der Steuerklass 1 folgendermoossen: An der Belsch ass de Spätzesteiersaz 50% bei ronn 35.000 Euro, a Frankräich 41% bei ronn 70.000 Euro, an Däitschland sinn et 45%, mä eréischt ab 250.000 Euro, an Italien 43% ab 75.000 Euro an an Irland, vun der Kris ge-beutelt, 41% ab 32.000 Euro versteierbart Joresakommes, Steuerklass 1. Mä déi virleschten Tranche vun 39% Spätzesteiersaz spillt hei am Land relativ séier, an zwar ab ronn 41.800 Euro versteierbart Joresakommes.

Här President, eng zweete Moossnam am Steuerpak ass d'Eropsetze vun der Solidaritéits-steier. Si geet bei de Privatpersoune vun aktuell 4% op 7% an d'Luucht. Ab engem versteierbare Joresakommes an de Steuerklassen 1 an 1A vun 150.000 Euro respektiv 300.000 Euro an der Steuerklass 2 geet d'Solidaritéitssteuer dann op 9% an d'Luucht. Dat heescht, dass nëmmen déi Akommesbranche, déi iwwer 300.000 Euro bei enger Koppel erausgeet, mat 9% Solidari-téitssteuer belaauscht ass. Bis zu deem Montant spille fir jiddwereen, dee Steiere bezilt, 7%. Bei Jonggesellen an Elengerzéier, an der Regel an der Steuerklass 1, spille 7% bis 150.000 Euro Joresakommes.

D'Solidaritéitssteuer gëtt hei am Land vun de Résidenten an den Netrésidenten bezuelt op deem Akommes, wat se zu Lëtzebuerg versteieren. Eng Solidaritéitssteuer vu 7% oder 9% heescht fir den Eenzelnen net zousätzlech 7% oder 9% méi Steieren. D'Solidaritéitssteuer gëtt nämlech net op dem versteierbaren Akommes berechent, mä op dem Montant vun der Steierschuld. Een, dee sengem Steierbescheid no keng Steiere muss bezuelen, bezilt och keng Solidaritéitssteuer. Dat ass, wéi virdru schonns gesot, bei 40% vun de Stéit hei zu Lëtzebuerg de Fall.



Mat der Solidaritéitssteuer läit den eigentleche Spätzesteiersaz vun engem Stot mat engem versteierbare Joresakommes vun 300.000 Euro a méi ab dem 1. Januar 2013 bei 43,6%. Fir all 1.000 Euro, déi een doriwwer verdéngt, gi 436 Euro Steieren un de Stat.

Insgesamt bréngt d'Erpsetze vun der Solidaritéitssteuer bei de Privatpersounen ee Plus vu ronn 102 Milliounen pro Steuerjoer. Dat ass e substanzuelle Montant. Deen explizéiert sech doduerch, dass a méi héijen Akommestranchen dach zu Lëtzebuerg vill Steiere bezuelt ginn. Wéi gesot, 2,5% vun de Leit bezuele ronn 37% vun dem Steueropkommes.

Ronn 25.000 Steuerzueler, meeschtens Stéit, déi gemeinsam veranlagt ginn, hunn ee steierpflichtegt Joresakommes vun iwwer 100.000 Euro, ronn 18.000 Stéit ee versteierbart Akommes vu méi wéi 150.000 Euro, 12.500 Stéit ee versteierbart Akommes vu méi wéi 200.000 Euro a 5.750 Stéit, dovunner 5.000 Stéit reng zu Lëtzebuerg, ee versteierbart Joresakommes vu méi wéi 250.000 Euro.

Iwwert déi leschten 30 Joer gekuckt louch d'Solidaritéitssteuer fir Privatpersounen schonns '84 a '85 eng Kéier bei 10%. An den 90er Jore bis 2009 war se fir Privatpersounen onverännert bei 2,5%, ab 2011 jee no Revenu tëscht 4% a 6%, fir elo bei 7% bis 9% jee no Akommes ze leien.

D'Solidaritéitssteuer, déi fléisst dem Gesetz no an de Beschäftigungsfong. Dem Beschäftigungsfong seng Dépense sinn an der rezenten Vergaangenheet besonnesch opgrond vun dem steigende Chômagetaux, mä och vun den Initiativen, fir d'Jugendarbeitslosigkeit ze bekämpfen, stänneg an d'Luucht gaangen.

Drëttens, d'Solidaritéitssteuer gëtt och vun de Betriber bezuelt. Si geet op den 1. Januar 2013 vun haut 5% op elo 7% an d'Luucht. Um Niveau vun de Betriber ass et den héchsten Taux, dee mir zënter 1975 kennen. Hëlt een d'SOPARFlen eraus, da bezuelen zënter 2011 ronn 80% vun de Betriber hei am Land keng Kierperschaftssteuer, deemno och keng Solidaritéitssteuer. D'Erpsetze vun der Solidaritéitssteuer bréngt um Niveau vun de Betriber e Plus vu 36 Milliounen Euro pro Joer. Och des Sue fléissen an de Beschäftigungsfong.

Véiertens, d'Gemengen, déi bezuelen ab 2013 och Solidaritéitssteuer, an zwar 2% vun der Gewerbesteier, déi se kréien. Dat ass e Plus vun 12 Milliounen Euro pro Joer.

Fënneftens, och bei der sougenannter „Kilometerpauschal“, ee waarmt Eisen an der Lëtzeburger Steuerpolitik, gëtt et eng Annerung. Déi éischt véier Kilometer Distanz tëscht Wunnuert an Aarbechtsplaz gi steierlech net méi a Betruecht gezunn. Dës ware bis elo automatesch an dem Steuerbarème matagebaut a sinn och deem zeguttkomm, deen zum Beispill an der Stad wunnt an an der Stad schafft. Am Kloertext heescht dat, dass d'Fahrtkosten, déi ee steierlech ka geltend maachen, an Zukunft ëm véiermol 99 Euro, dat heescht insgesamt 396 Euro, erofgesat ginn. Dës Moosnam beedeit fir de Stat e Plus u Steuerrecettë vu 35 Milliounen Euro pro Joer.

Sechstens, um Niveau vun de sougenannten „dépenses spéciales“, also de Sonderausgaben, gëtt de Montant vun de Schuldzinsen op Konsumkreditte, déi ee steierlech kann ofsetzen, halbéiert. Bis elo waren dat 672 Euro pro Joer pro Persoun an engem Stot. Ab dem nächste Joer wäerten dat nach 336 Euro pro Persoun am Stot sinn. Dës Moosnam eleng bréngt dem Stat ronn 7 Milliounen Euro d'Joer méi. Si spillt ab dem nächsten 1. Januar an deemno och op lafende Konsumkreditte.

Opgrond vun den niddrege Schuldzësen muss een des Reduktioun awer an de richteg Kontext setzen. Ee Stot mat zwee Erwuessenen an zwee Kanner kann d'Schuldzësen vun engem Prêt vu 35.000 Euro, verzëst zu 3,5%, trotz Reduktioun vum Abatement nach integral vun de Steieren ofsetzen.

De Statsrot seet a sengem Avis zum Statsbudget 2013 grad wéi zu dësem Steuerpak, dass ee generell sollt steierlech Abatementen iwwerpräiwen op hir Wierkung als Lenkungsinstrument an op d'Auswirkung op déi generell Steuerrecetten. Dëst ass effektiv keng onweseentlech Fro. Niewent de Sozialbäiträg kënne besonnesch d'Schuldzësen op den Immobilien oder fir zum Beispill en Autoskaf, verschidden Assurancen, Bauspueren, Zousazversicherungen, déi ee privat mécht, steierlech geltend gemaach ginn.

Insgesamt ginn iwwert dee Wee vun de Steuerabatementen a Sonderausgaben iwwer 1,3 Milliarden Euro pro Joer steierlech begëschtegt. Mat engem durchschnittleche Steiersaz vun 20% heescht dat fir de Stat ee Steierausfall pro Joer vu ronn 275 Milliounen Euro. Vun deenen Abatemente profitéiert natierlech just deen, dee Steiere bezilt. Ass dat versteiertlecht Akommes méi héich, ass de Steiergewënn na-

tierlech och méi héich. Een, dee keng Steiere bezilt, huet näischt dovun. Mä och dee Mann oder déi Fra muss eng Autoshaftpflicht bezuelen.

De Montant vun den Abatementen ass méierendeels zënter 1990 net méi ugepasst ginn. De finanziellen Impakt fir de Stat geet doduerch natierlech mat der Zäit erof. Eng generell Evaluatioun vun de verschiddene Steuerabatementen, wéi vum Statsrot proposéiert an iwwregens och an dem Regierungsprogramm ugeduecht - den Här Lux huet dat geschéit schonns ënnerstrach -, ass deemno méi wéi berechtigt.

Här President, siwente Punkt: Et interesséiert wuel, wat dann all déi Steiermoosnamen elo fir deen Einzelne konkret ab 2013 ausmaachen. Dozou e puer Zuelen: Bei 35.000 Euro versteierbart Joresakommes, dat heescht zum Beispill ee Jonggesell mat engem Bruttoloun vu ronn 3.500 Euro de Mount, mécht dat ee Plus ab dem 1. Januar 2013 vun 259 Euro méi Steieren aus. Bei 50.000 Euro versteierbart Joresakommes, dat heescht ronn 5.000 Euro Bruttoloun de Mount, mécht et e Plus vun 283 Euro pro Joer an der Steuerklass 2, also bei enger Koppel, aus, bei 100.000 Euro versteierbart Joresakommes 1.042 Euro an der Steuerklass 1 a 759 Euro an der Steuerklass 2.

Mä et geet nach weider: bei 150.000 Euro versteierbart Joresakommes 2.165 Euro an der Steuerklass 1 respektiv 1.511 Euro an der Steuerklass 2, wou déi zwee Partner schaffen. Bei 200.000 Euro mécht et an der Steuerklass 2 da schonns 2.105 Euro aus. Bei 300.000 Euro sinn et der 4.351 a bei 400.000 Euro versteierbart Joresakommes vun engem Stot, wou déi zwee Partner schaffen, dach schonns 6.611 Euro méi Steiere wéi 2012. Breet Schëlleren droen deemno méi.

Op de Mount verrechent maachen all déi Steiermoosnamen no dem dach fundéierten Avis vun der Chambre des Salariés ab dem 1. Januar 2013 folgend Abousen aus:

An der Steuerklass 2, wou déi zwee Partner schaffen, bei 4.500 Euro Bruttoakommes de Mount, do sinn et 28 Euro, bei 8.200 Euro Bruttoakommes de Mount 82 Euro a bei 16.400 Euro Bruttoakommes de Mount 167 Euro.

An der Steuerklass 1, nach kuerz, gëtt et folgend Abousen: 11 Euro de Mount fir de Mindestlounbezéier, 53 Euro de Mount bei engem Bruttoakommes vu 4.100 Euro a 85 Euro bei engem Bruttoloun vun 8.100 Euro. D'Chambre des Salariés zielt dann nach zousätzlech de Verloscht duerch d'Netinflationenberengung vun der Steiertabell derbäi. Dat hunn ech awer bei dëse Rechebeispiller ewechgelooss, well gesetzlech Inflationenberengung hei zu Lëtzebuerg keen Automatismus ass.

Här President, achte Punkt: Um Niveau vun de Privatpersounen gëtt schliesslech de sougenannte Regime vun den „stock options“ ab dem 1. Januar 2013 geännert. Stock options, dat ass vereinfacht gesot ee System, wou de Salaré kann Aktië vu senger Entreprise kafen, an der Regel zu engem verbëllegte Saz.

Am Kontext vun der Steuerreform 2002 ass dës Bedeelegung steierlech begëschtegt ginn. Dat hu mir deemools missen aus internationale Kompetitivitéitsgrënn maachen, well dat och an anere Länner de Fall ass. De Sënn vun dëser fiskalescher Begëschtegtung ass et, de Salaré u seng Entreprise ze bannen. Dëse System ass awer iwwert d'Joren, fei gesot, llicht entaart!

Secteurweis verfügen (veuillez lire: profitéieren) - nu lauschtert gutt no - Honnerte vu Salaréen vun dësem System, souguer an Entrepenen, wou de Stat selwer Aktionär dran ass. Ee substanzuellen Deel vun de Salären (veuillez lire: Salaréen) hirem Akommes gëtt iwwert dëse Wee en fin de compte mat engem Steiersaz vun oft manner wéi 5% besteiert. Déi dovu profitéieren, dat sinn awer beileiwen net déi Äermst! Ab 2013 ass dofir domadder Schluss.

Am Sënn vu méi Steiergerechtgeet gëtt de Regime vun de Stock options elo geännert. Dat geschitt net iwwert de Wee vun dësem Gesetz, mä iwwert de Wee vun enger Circulaire vun dem Steierdirekter. Firwat? Mä well de Regime 2002 och duerch esou eng Circulaire vum Steierdirekter agefouert gouf. Mä d'Virgab vum Parlament - an dat soll ënnerstrach ginn - duerch dëse Gesetzesprojet ass kloer: Et gëtt ee Plus vu 50 Milliounen Euro erwaart, sou wéi vun der Regierung an dem Exposé des motifs grad wéi an der Fiche financière vun dem Gesetzesprojet ugefouert. Dës Upassung vum Regime iwwer Circulaire däerft deemno keng reng Kosmetik sinn.

Néngte Punkt: Eng weider Moosnam, fir nei Steuerrecetten ze schafen, ass d'Verduebelung vun der Mindeststeuer vu 1.500 Euro d'Joer fir d'SOPARFlen, also déi sougenannten „sociétés de participations financières“. Ab dem 1. Januar 2013 sinn 3.000 Euro pro SOPARFI fälleg.

D'SOPARFI si Gesellschaften am Finanzberäich, ronn 34.000 Stéck un der Zuel, déi hei zu Lëtzebuerg sinn. Hir Aktivitéit besteet haapt-sächlech doran, Bedeelegungen an anere Gesellschaften ze hunn. An der Regel besteet de Bilan vun dëse Gesellschaften aus méi wéi 90% Finanzaktiva. Bedéngt duerch e favorable Besteuerungssystem bezuelen dës SOPARFlen awer éischter weening Steieren. Si schafen awer op der Finanzplaz, dat soll een och soen, direkt oder indirekt munch Aarbechtsplazen.

De Prinzip vun der Mindestbesteuerung op de SOPARFI gouf virun zwee Joer agefouert. De Montant gëtt elo verduebelt, mä domat ass et net genuch: Och aner Gesellschaften, déi keng SOPARFI sinn, mussen an Zukunft eng Mindeststeuer bezuelen. Betrafft vun dëser Moosnam sinn net manner wéi 37.000 Gesellschaften.

De Montant vun der Mindeststeuer geet vu 500 Euro d'Joer bis zu 20.000 Euro. De Montant geet am Verhältnis zu der Bilanzsomm an d'Luucht. 500 Euro sinn ze bezuele bis zu enger Bilanzsomm vun 350.000 Euro, 5.000 Euro bis zu enger Bilanzsomm vun 10 Milliounen Euro, 15.000 Euro bis zu enger Bilanzsomm vu 15.000 Euro (veuillez lire: 15 Milliounen Euro), an 20.000 Euro, wann d'Bilanzsomm iwwer 20 Milliounen Euro erausgeet.

D'Verduebelung vun der SOPARFI-Steier an d'Afféierung vun enger Mindeststeuer op allen aneren Handelsgesellschaft bréngt zousätzlech 100 Milliounen Euro méi Kierperschaftssteuer pro Joer. Dës Mindeststeuer ass, wéi hiren Numm et seet, ee Minimum vu Steieren, deen ee muss bezuelen. Si kann deemno net op d'Vermögenssteuer imputéiert ginn.

Vun dëser Mindeststeuer kënnen och keng Steierbonifikatiounen ofgezu ginn, zum Beispill, wann ee Betrib Investissementer mécht oder Chômeuren stellt respektiv eng Steierbonifikatioun kritt, fir d'Fraisé vu Berufsausbildung vu senger Matarbechter ofzedecken. Eenzeg Ausnahm ass déi, wann d'Mindeststeuer iwwert déi effektiv Kierperschaftssteuer, déi dem Tarif no geschëllt wier, erausgeet. Den Iwwerschoss kann dann op déi nächste Joren als Avance reportéiert ginn.

Eng weider Limitatioun ass och déi bei enger sougenannter „Organschaft“, also enger Intégration fiscale. Well d'Mammegesellschaft direkt oder indirekt d'Filiale kontrolléiert, andeems se méi wéi 95% vum Kapital hält, gëtt dës Konsolidéierung prinzipiell steierlech begëschtegt. Dat wäert och am Fall vun der Mindeststeuer spillen. Bei de Mammegesellschaften grad wéi bei all Filial gëtt d'Mindeststeuer opgeheween, mä bis zu engem Plaffong vun 20.000 Euro.

Dat ass, vereinfacht erkläert, de Prinzip vun der Mindeststeuer, sou wéi en definitiv vun der Finanzkommissioun zréckbehalte gouf. D'Mindeststeuer ass an engem gewëssene Sënn ee Paradigmewissel: Ab 2013 bezilt all Handelsgesellschaft zu Lëtzebuerg Steieren.

Dofir hat et och eng Rei vu verfassungsrechtliche Bedenke géint iwwer dem urspréngleche Regierungstext vun dem Statsrot ginn. De Statsrot huet op enger Rei Punkten opgeléicht, dass dësen Text géint international Duebelbesteuerungsofkommessen an EU-Recht verstéisst, an huet dofir och dräi Oppositionen formelles gemaach. D'Finanzkommissioun huet d'Textännerungen, wéi vum Statsrot proposéiert, eent zu eent ugeholl.

Mat der definitiver Fassung vun der Mindeststeuer maache mir kee Cavalier seul zu Lëtzebuerg. Mir orientéieren eis un der eisträichescher Gesetzgebung, mä de Montant vun der Mindeststeuer zu Lëtzebuerg ass méi héich. Am Géigesaz zu Eisträich bezuelen hei am Land d'Enterprenen nämlech och nach Vermögenssteuer.

Déi definitiv Fassung vun der Mindeststeuer, sou wéi se zur Ofstëmmung virläit, ass och objektiv gekuckt verkrafftbar. Et ass een Équiliber tëscht méi Steuerrecetten, méi Steiergerechtgeet an engem weiderhi kompetitive Betribssteiersystem zu Lëtzebuerg. Eng Gesellschaft, déi ee Verméige vun iwwer 20 Milliounen Euro an hirem Bilan stoen huet, déi muss oder misst vill méi och an Zukunft bereet sinn, ee Promille, also een Dausendstel dovunner als Steuer ze bezuelen. Am Sënn vun der Previsibilitéit vun der Betribssteierlandschaft - e wichtegt Element vun der Kompetitivitéit - bleift de Prinzip an de Berechnungsmodus vun der Vermögenssteuer op de Betriber esou bestoen, wéi en zënter 2002 gutt funktionéiert.

D'Regierung hat eng technesch Adaptatioun an dem urspréngleche Gesetzestext virgesinn. Opgrond vun dem Statsrot sengem Avis huet d'Finanzkommissioun den Textvorschlag vun dem Conseil d'État och op deem Punkt iwwerholl. Et bleift also bei der Vermögenssteuer alles bei deem elo System. Domadder ass weiderhi séchergestallt, dass Betriber, déi hir Eegemët-

tele konsequent steigern an iwwert dee Wee hir Investissementer assuréieren, steierlech net benodelegt sinn.

Zéngte Punkt: D'Steierbonifikatioun fir Investissementer, dat heescht de faméisen Artikel 152bis vun eise Steiergesetz, gëtt ofgeännert. Genée gesot geet den Taux de bonification op dem sougenannten „investissement global“ vun elo 3% op 2% erof. D'Bonifikatioun fir den Investissement global, dat ass déi Bonifikatioun, déi ee Betrib kritt, wann en iwwerhaapt investéiert.

Beim Investissement complémentaire geet den Taux vun der Steierbonifikatioun vun 13% op 12% erof. Den Investissement complémentaire ass vereinfacht gesot dat, wat een investéiert iwwert d'Amortissementer, also d'Ofschreiwungen eraus. De System gëtt also llicht manner favorabel, mä dat bréngt dem Stat awer zousätzlech 20 Milliounen Euro.

Eeleften - an elo komme mer zum Schluss - Punkt: Enn 2006, Här Lux, do war et d'Reform vun der Autossteuer. D'Autossteuer bréngt dem Stat geschate 67 Milliounen Euro pro Joer. Dat ass eppes méi wéi dat Duebelt vum Joer 2006, also deem Joer virun der Reform. Längerfristeg däerft d'Recette vun der Autossteuer awer erëm erofgoen. Firwat? Mä, eisen Automobilspark erneiert sech schnell. D'Leit kafen zu Lëtzebuerg, trotz Kris, méi oft een Auto wéi am Ausland. Déi nei Autoen hu reduzéiert CO₂-Emissiounen, an dat ass och eng gutt Saach.

Et kënnt derbäi, dass de Moment op ronn 25.000 Autoe manner wéi 50 Euro Autossteuer pro Joer ze bezuelen ass. Weider - lauschtert gutt no! - 91.000 Dieselautoen, wou d'Autossteuer zwar méi wéi 50 Euro d'Joer ass, kréien eng Ermässegung vu 50 Euro, well se e Partikelfilter hunn. Mä all Dieselauto muss hei am Land e Partikelfilter hunn, well soss gëtt en iwwerhaapt net zu Sandweiler ugemellt. Elo gëtt dës Partikelfiltersubventioun gestrach an eng Mindesttax op all Auto vun 30 Euro agefouert. Dat bréngt ee Plus vu ronn sechs Milliounen Euro Steuerrecettë pro Joer méi.

Zwielefte Punkt: Den Artikel 125 aus eise Steiergesetz gëtt ofgeschaaft. Dës Bestëmmung betrëfft d'Inflationenberengung vun der Steiertabell. Wann de Konsumindex ëm méi wéi 3,5% während engem Joer an d'Luucht geet, misst d'Regierung ee Gesetzesprojet déposéieren, fir d'Steiertabell deementspreechend nei auszerichten. Et ass also keng automatesch Upassung vun der Steiertabell un d'Inflation, wéi dat oft dobausse gemengt gëtt. Et ass, dem Text no, nëmmen eng Verflüchtung fir d'Regierung, eng Propos ze maachen, déi da vun der Chamber ugeholl gëtt oder, le cas échéant, ofgelehnt gëtt. Aus budgetäre Grënn gëtt dësen Artikel elo gestrach.

Dräizéngte Punkt: D'Volkszählung oder besser gesot, de Recensement fiscal gëtt ofgeschaaft. Déi entsprecheend Artikel ginn aus der Abgabebestëmmung gestrach. Dat ass kee Feeler, kommen dës Bestëmmungen dach aus enger éischter däischerer Zäit fir eist Land.

Fir dat ze verdäitleche ginn ech lech just Lecture vun engem klengen Paragraph, dee mer elo ofschafen: „Die Personenstandsaufnahme erstreckt sich nicht auf diejenigen Angehörigen der Armee und der Polizei“, den Texte original war „der Wehrmacht, der Schutzpolizei und des Arbeitsdienstes, die in Mannschaftsräumen militärischer oder polizeilicher Dienstgebäude oder Kriegsfahrzeugen untergebracht sind und keine andere Wohnung haben“.

(Interruption)

D'Steier...

Dat schafe mer of, Här Meyers.

► **Une voix.** - Dat hätt scho laang missen ofgeschaaft ginn!

► **M. Gilles Roth** (CSV), *rapporteur*. - Mä ze spët...

► **M. Paul-Henri Meyers** (CSV). - Mir hu jo 60 Joer gebraucht, bis mer dat gemierkt hunn!

► **M. Gilles Roth** (CSV), *rapporteur*. - Ech brauch elo nach zwou Minutten, da si mer fäerdeg.

D'Steierkaarte ginn ab 2013 direkt vun der Steierverwaltung elo erstallt. Fir d'Gemeenge bedeit dat eng Aarbechts- a Käschtenentlaaschtung, fir d'Steierverwaltung natierlech e Plus un Aarbechtsopwand.

De Gesetzesprojet gesäit och um Niveau vun der TVA eng kuerz Annerung vir, um sougenannten „régime de franchise“. Wat heescht dat? An Zukunft kënne Steierpflichteger, déi e Chiffre d'affaires hu vu manner wéi



25.000 Euro, eng vereinfacht TVA-Deklaratioun maachen, respektiv kënnen si vun der Pflicht, eng Deklaratioun ze maachen, ganz entbonne ginn. Si däerfen natierlech dann och keng TVA verrechnen a mussen dat op der Rechnung prezisieren.

Bis elo louch de Plaffong vun dem Régime de franchise bei 10.000 Euro. Aus Grënn vun administrativer Vereinfachung gëtt de Plaffong elo op 25.000 Euro an d'Luucht gesat, an dovunner profitéieren haaptsächlech ronn 3.200 kleng Entreprises. De Steierausfall ass dobäi minime.

Nach kuerz zum bëllegen Akt: Eng technesch Upassung gëtt et um Niveau vun dem Steierkredit. Leit, déi am sougenannten „Espace économique européen“ wunnen, dat heescht d'Europäesch Unioun plus Island, Norwegen a Liechtenstein, kënnen an Zukunft vun dem bëllegen Akt hei zu Lëtzebuerg profitéieren, wa se eng Wunneng kafen, an dat - dat ass nei - schonns am Moment, wou se de Kafakt ënnerschreiwen. Bis elo kruten déi Leit, déi net am Land Résident waren, zum Beispill zu Metz gewunnt hunn, d'Enregistrementskäschtchen eréischt erëm, wa se eng Demande dofir gemaach hunn a wa se den Immeuble bewunnt hunn oder verlount haten.

Mir maachen dës Upassung, fir net eng Diskriminatioun vu Bréissel (veuillez lire: virgeworf) ze kréien. Dës Upassung ass awer käschtchenneutral.

Dee leschte Punkt ass schliesslech deen, dass déi steierlech Vergéngschtegung vun dem super-reduzéierten TVA-Saz vun 3% beim Bau oder der Renovéierung vu Wunnenge bis zu engem maximale Plaffong vun elo nach 50.000 Euro spilt. An de Joren 2009 bis 2012 waren dat nach 60.000 Euro. Deemno ass de Plaffong ëm 10.000 Euro erofgaangen. Wat heescht dat dann elo konkret? Mä, dass ee bei engem Hausbau an Zukunft nach bis zu engem Präis vu ronn 420.000 Euro den niddregen Taux vun 3% TVA applizéiert kritt. Bis elo war dat bis zu engem Präis vu ronn 500.000 Euro de Fall. Dës Ännerung geschitt awer net iwwert dës Gesetzesprojet, mä duerch e Règlement grand-ducal.

Här President, dat waren, zum Deel méi praktesch erkläert, déi Haaptmoossname vum Steierpak, esou wéi se der Chamber muer zum Vote virleien. Si sollen den 1. Januar 2013 a Kraaft treden, mat Ausnahm vun der Émännerung bei der Autossteuer, déi ab dem 1. Februar 2013 spilt.

(Interruption)

Fir de Rescht, Här Bettel, verweisen ech op mäi schrëftleche Rapport, fir deen d'Finanzkommissioun majoritär de leschte Freideg hiren Accord ginn huet, an ech soen lech Merci fir d'No-lauschteren.

► **Plusieurs voix.** - Très bien!

► **M. le Président.** - Merci dem Rapporteur. D'Diskussiounen iwwert de Projet de loi si muer zesumme mat den Diskussiounen iwwert de Budgetsrapport.

Da komme mer elo zum Exposé vum Här Finanzminister Luc Frieden iwwert de Statsbudget fir d'Joer 2013. Ech wollt lech hei nach eng Kéier drop hiweisen, dass dës Exposé an d'Gebäerdesprooch iwwersat gëtt, a wollt och den Här Minister bieden, e bësselche méi lues ze schwätzen.

Här Minister, Dir hutt d'Wuert.

2. 6500 Projet de loi concernant le budget des recettes et des dépenses de l'État pour l'exercice 2013

Exposé

► **M. Luc Frieden, Ministre des Finances.** - Här President, Dir Dammen an Dir Hären Deputéiert, Madame, Dir Häre Ministeren, ech géif fir d'Éischt gären dem Budgetsrapporteur, dem Här Lucien Lux, Merci soe fir déi vill Aarbecht, déi mer an deene leschte Wochen a Méint a senger Qualitéit als Budgetsrapporteur zesumme gemaach hunn. Eng ganz Rei vun deenen Iddien, déi an dem schrëftlechen a mëndleche Rapport zum Budget waren, sinn Iddien, déi derwäert sinn, dass een driwwer diskutéiert - net nëmmen haut, mä och an deene Méint, déi elo kommen - an deem Kontext vum Redressement vun de Statsfinanzen. Duerfir e grouse Merci an Unerkennung fir déi Aarbecht, déi hien a seng Équipe an och déi aner Kolleegen an der Finanzkommissioun ënnert dem President Michel Wolter gemaach hunn.

Och e Merci géif ech gären hei un de Rapporteur vum Projet de loi iwwert d'Steier-upassungen, den Här Gilles Roth, ginn. Hien huet dat de Moien op eng technesch einwandfrei Aart a Weis erkläert, wat mir évitéiert, op eng ganz Rei vun deenen Detailer nach eng Kéier anzegoen. Mä dat gehéiert zu där Budgetsdebat, an duerfir, mengen ech, war et gutt a richtig, dass mer domadder de Moien hei ugefaangen hunn.

Här President, verschidde Leit, och heibannen, waren e bëssen erstaunt, dass de Budget an zwou Etappen erstallt ginn ass an dass ech de Budget net mat grousser Begeeschterung virgestallt hunn. Och e Finanzminister muss d'Recht hunn ze weisen, dass en a Krisenzäite besuergt ass iwwert d'wirtschaftlech an ekonomesch Situatioun. Och e Finanzminister muss d'Recht hunn, Emotiounen ze weisen. An ech soen lech et, léif Kolleeginnen a Kolleegen, den Defizit reduzéieren ass eng enorm schwierige Aufgab - einfach, wann ee se eleng mécht, schwierig, wann ee se an engem Grupp vu Leit mécht!

Déi, déi mech kennen, wëssen, dass ee mech net brauch zu enger Defizitreduzéierung ze drécken. Besonnesch net dann, wann een den Defizit reduzéiert duerch strukturell Dépensereduktiounen. Mä an enger Gesellschaft, an de Parteien, am Parlament gëtt et vill Meenungen iwwert d'Moossnamen, ob, wéi vill a wéi een den Defizit ka reduzéieren.

Datt ech mech net selwer an all deene Meenungen ermënnen, ass dat Normalst vun der Welt. D'Aufgab vun der Politik, och vum Finanzminister ass et, aus deene Gespréicher Kompromësser mat an de Budget afléissen ze loosse. Dat ass geschitt. An duerfir mengen ech, dass dat Ganz en fait, och wann ech dat zréckkucken, eppes ganz Positives hat: Well souwuel heibanne wéi am Land, an dat hunn ech och a ville Bréiwer gemierkt, déi d'Leit mer geschéckt hunn, ass e richtigen Débat iwwert d'Situation économique an déi finanziell Situatioun vum Land entstanen. Déi Debatt ass noutwendig. Déi Debatt ass grad an dësen Zäiten nützlich fir d'Zukunft vun de Statsfinanzen, net nëmme fir de Budget 2013, mä virun allem och fir déi Joren duerno.

Duerfir géif ech och gären haut a mengen Ausféierungen zum Budget natierlech iwwert de Budget 2013 schwätzen, mä an engem zweeten Deel och driwwer, wéi déi Evolutioun hei zu Lëtzebuerg an an Europa wäert weidergoen.

Jo, Lëtzebuerg an Europa sti virun enormen Erausforderungen an en fait fundamentale Richtungsentscheedungen! Zënter fënnf Joer - dat ass laang - schleift Europa sech duerch dës Kris, an ech géif soen, et si Krisen: Finanzkris, Wirtschaftskris, Währungskris, mat Aspekter vu sozialer Kris. An de Budget 2013, och iwwergens d'Konten 2012, kann een net lassgelaist gesi vun där schwieriger ekonomescher Situatioun. Dat ass en fait keng ekonomesch Situatioun wéi eng aner an déi Kris ass net muer de Moien eriiwwer!

Et ass eng fundamental Afrostellung vu willem, wat mer an Europa bis elo haten. D'Amerikaner nennen dat en „turning point“. Ech géif soen, et ass eng Zort Rond-point, an deem mer dréien a wou ee muss déi richtig Ausfahrt fannen.

Datt ass eng Debatt jo net nëmmen hei zu Lëtzebuerg, well iwwerall an Europa gesi mer, dass mer héich Scholden hunn, en héijen Defizit, bal kee Wuesstum an e vill ze vill héije Chômage.

Wuesstum an Aarbechtsplaze schafen, ouni Scholden an Defizit ze maachen, dass ass am Fong den Défi, dee mer an Europa an zu Lëtzebuerg hunn. An deen ass selbstverständlech net einfach an dee kann een net vun haut op muer emsetzen. An Dir gesitt, och an deene Länner, wou nëmme vu Wuesstum geschwat ginn ass, wou ee gemengt huet, et kéint een op d'Spuere verzichten, hu mer, subal déi Leit Regierungsverantwortung iwwerhollt hunn, gesinn, dass se op d'Realitéit vum Terrain erëmkommen sinn. Et kann ee kee Wuesstum hunn, wann een net gesond Statsfinanzen huet. An et sinn eben deen Équilibrium an déi Zilrichtung, déi mer zesumme mussen fannen.

D'Weltwirtschaftssituatioun ass alles aneschteres wéi roseg. An der Eurozon wäerte mer d'nächst Joer kaum Wuesstum hunn. Mir hunn eng ganz Rei Moossname geholl, déi hu mer jo och heibannen diskutéiert, fir d'Eurozon ze stabiliséieren, mä dat brauch laang Zäit, ier dat seng ekonomesch Friichten dréit. Och déi Strukturreformen, déi an enger Rei vu Länner gemaach ginn, droe jo net vun haut op muer hir Friichten. Duerfir wäert d'Wuesstum leider ganz niddreg bleiwen. An dat huet natierlech fir e Land wéi eist, mat enger oppener Ekonomie, en Impakt och op eis.

Amerika, Japan, do ass lues a lues e Wuesstum feststellen, woubäi an Amerika d'politesch Léisung vum Budgetsproblem, deemno wéi déi

gemaach gëtt, och eng Inzidenz wäert hunn op d'ekonomesch Entwécklung. Et kann een nëmmen hoffen, dass do e Kompromëss schnell fonnt gëtt.

An dann, ganz anescht gesäit et aus an deene sougenannten „emerging market economies“, enger Rei Länner, wou d'Ekonomie schnell wiisst: Asien mat China, Türkei, Mëttleren Orient, Deeler vu Latäinamerika. Den Défi fir eis ass am Fong, eng Ubannung ze fannen un dee méi schnelle Wuesstum vun deenen doten dynamischen Ekonomien.

Also, d'Perspektiven - op d'mannst an eise Regiounen - si schwach an et bleiwe vill negativ Risquen, iwwert déi een net kann einfach ewechgoen.

Wann ech dat ënnerschiddlecht Bild vun der Welt do molen, dann ass et interessant feststellen, dass aus enger kierzlecher Etüd vun der OCDE iwwert d'Zeenarië vun der Weltekonomie bis 2060 och ganz kloer ervirgeet, dass de Mouvement vum Wuelstand an der Welt, wou de Centre de gravité haut an Europa an Amerika ass, sech zu deenen dynamischen neie Maartekonomen ausserhalb vun eise Kontinent an ausserhalb vun Amerika wäert bewegen.

Alles dat musse mir an eisen Iwwerleeunge mat am Kapp behalen. Et ass also net nëmmen eng momentan Kris oder en „turning point“, mä et sinn och Reflexiounen, déi mer méi generell mussen iwwer eis Ekonomie an eise Modell maachen.

Natierlech ass vis-à-vis vun deem Constat do d'Léisung net, fir d'Knëppele bei d'Tromm ze geheien, mä mir musse mat ambitiëse Reformen an enger Budgetkonsolidéierung op de Pad vum Wuesstum zréckkommen a weltwäit Ongläichheete kënnen verënnern.

Mir musse mëttel- a laangfristeg an Europa an heiheem kucken: Wéi kënnen mer konkurrenz-fäeg bleiwen, fir de Chômage erofzekréien? Well nëmme konkurrenz-fäeg Betriber schafen Aarbechtsplazen.

Wéi kënnen mer sozial Ongläichheeten esou kleng wéi néideg halen? Virun allem geet et drëm, Extremer vun Aarmut a Räichtum ze évitieren.

Wéi kënnen mer dee Wuesstum maachen, ouni dass mer dobäi d'Ëmwelt ze vill schiedegen?

A wéi kënnen mer eis a wéi musse mer eis institutionell opstellen, fir dass mer schnell an effikass kënnen entscheeden? Och dat ass e groussen Défi an Europa an zu Lëtzebuerg, well oft geet et op béide Plazen ze lues an enger schnell ännerender Welt.

Ech mengen, dass et net onméiglech ass, eng Rei vun deene Reformen ze maachen. Eng Rei Länner an Europa, déi sougenannte Problemlänner, déi Hëllef kréien aus den europäesche Rettungsschiermer, hunn ënner dramateschen Émstänn gewisen, wéi Strukturreformen en fait zu neiem Wuesstum kënnen féieren. Irland ass do vläicht e Beispill, wat am nooste bei der Situatioun vum eise Land ass. D'Iren hunn eng ganz Rei Reformen misse maachen an engem ganz schlëmmen Moment, déi elo erëm Vertraue schafen an déi, hoffe mer fir si a fir eis, zu Wuesstum erëm kënnen féieren.

D'Budgetsituatioun, d'ekonomesch Situatioun zu Lëtzebuerg fir 2013, wéi gesot, muss een an deem europäeschen an internationale Kader gesinn. Ech géif duerfir gären nach eng Kéier rappeliieren, wou mer fir de Moment an eise Wirtschaftsprognose stinn.

2011 si mer ëm ronn 1,5% gewuess, 2012 wäerte mer 0,5% wuessen an '13 - mengt de Statec - ronderëm 1%. Erënnert lech drun, dass mer fréier Wuesstumsraten hate vu 4%, 5%, 6%. Mir sinn also elo e puer Joer hannerteneen an enger Situatioun, wou mer nëmme minimal wuessen.

Den Emploi wiisst nach, och de Budgetsrapporteur ass dorobber gëschtler agaangen, 2012 vläicht eppes ëm 2%, 2013 ëm 1,3%. Nach, mengen ech, musse mer verfeinert Analyse maachen, wou dee Wuesstum entsteet, sou dass mer dann och kënnen d'Leit, déi aus der Schoul kommen, op déi Plazen orientéieren, respektiv musse mer och kucken, wéi eng ekonomesch Effeten déi Secteuren hunn, wou déi Plazen do geschafe ginn. An de Chômage bleift leider an Europa an heiheem héich, mat eppes ronderëm 6% bis 6,5%.

De Budget 2013, an och dat huet den Här Lux gëschtler hei gesot, ass e Budget, dee sech am europäesche Kontext weise léisst. Mir respektéieren déi Haaptkritäre vun der Wirtschafts- a Währungsunioun. An trotzdeem gesäit een - a grad och am Kont fir 2012 - déi enorm Konsequenze vun der Kris. Och wann een haut nach net genee weess, wéi den Exercice 2012 ofschléisst, da stelle mer dach fest, dass mer beim Zentralstat wäerten en Defizit tëschent enger an 1,5 Milliarden hunn. A bei de gesamtöffent-

leche Finanzen - also Stat, Gemengen a Sécurité sociale - wäert deen Defizit bei eppes 800 Milliounen leien.

D'nächst Joer, wéi gesot, kréie mer deen Defizit duerch eng Rei Moossname reduzéiert. Dee Budget, deen also virläit haut a muer zur Diskussioun an Ofstëmmung, schléisst of mat engem Defizit bei de gesamtöffentleche Finanzen vun 380 Milliounen Euro a bei dem Zentralstat vun enger Milliard ronn Defizit.

Wat ass geschitt 2012? Mä et ass e ganz kloren Effet vun der wirtschaftlecher Situatioun. D'Recettë klamme manner schnell. Mir wäerten eng 200 bis 300 Milliounen manner erakréien, an zugläich lafen eis Dépenses awer weider. An déi Differenz erkläert den Defizit. Et ass also och dorunner, wou mer musse schaffen, wëssend, dass eist Land an der Kris weider awer eng ganz Rei Obligatiounen ze erfëllen huet.

Interessant ass awer, wann ech de Budget '13 kucken, dass mer et fäerdegbruecht hunn, dass d'Dépenses net schnell wuessen. D'Dépensé par rapport zu de Previsiounen vum Kont '12 wuessen nëmmen ëm 1,3%, a par rapport zum Budget vum leschte Joer ëm 3%. Dat ass manner wéi déi nei europäesch Norm, déi mer vum nächste Joer u musse respektéieren - déi muss een och elo scho respektéieren, mä vum nächste Joer un ass et e bindend rechtlecht Instrument -, well déi europäesch Norm géif am Fong 3,65% ausmaachen. Mir sinn also do drënner an dat ass och gutt, well mer jo en Defizit ze géréieren hunn.

Wann eise Budget op der Dépensésäit esou héich ass, dann ass dat eigentlech aus zwee Grënn: engersäits well mer vill Dépenses hunn, déi un der Zuel vun de Leit an eise Land hängen. Wann et méi Kanner gëtt, déi a Crèche an a Schoule ginn, wann et méi Leit gëtt, déi am Chômage sinn, dann huet dat selbstverständlech eng Inzidenz op d'Statsfinanzen.

An déi zweet Ursaach ass, dass de Stat villes mécht am ekonomeschen an am soziale Beräich, wat de Leit an de Betriber hei am Land zeguttkënn, an dass de Cumul vun deenen dote Saachen derzou féiert, dass mer héich Ausgaben hunn: an Héicht vu 14 Milliarden, 14,1 Milliarde bei der Administration centrale d'nächst Joer.

De Budget, an dat wëll ech och hei nach soen, well heiandso gemengt gëtt, de Finanzminister géif do reng d'Chiffere kucken - dat ass weder hei am Land richtig nach am Ausland -, mä et ass och keng Onéier fir e Finanzminister, d'Chiffere ze kucken, mä och dee weess, wéi all d'Kolleegen an der Regierung, dass hannert deene Chifferen Ziler a Mënsche stinn, de Budget also mécht jo ganz viles, fir dass et hei am Land de Mënsche materiell gutt geet, dass sech eist Land weiderentwéckelt, dass eis Infrastruktur gutt sinn. E mécht vill fir d'Solidaritéit, e mécht vill fir d'wirtschaflech Zukunft, e mécht vill fir d'Familjen, e mécht vill fir d'Grondaufgabe vum Stat.

Ech géif gären hei op e puer esou Aspekter, e puer esou Akzenter zréckkommen. Bei der Solidaritéit huelen ech zwou gréisser Dépenses:

De Fonds pour l'Emploi - natierlech belaauscht duerch déi schwierig ekonomesch Situatioun - gëtt d'nächst Joer eng ronn 650 Milliounen Euro aus. Dat ass Solidaritéit mat deenen, déi hir Schaff verluer hunn, oder Ënnerstützung vun deenen notament am Chômage partiel, wou mer wëlle kucken, dass de Betrib se an enger schwieriger ekonomescher Situatioun kann halen.

D'Assurance dépendance: Déi Dépenses, déi klammen, well et méi eeler Leit an der Gesellschaft gëtt, déi op d'Hëllef vu baussen ugewise sinn. An duerfir wuessen eis Dépenses am Budget op 220 Milliounen ronn.

Mir wëllen, dass et eng Gesellschaft gëtt, wou d'Kanner betreit ginn, fir déi Leit, déi dat wënschen. D'Kannerbetreiung, wat en Akzent vum Budget ass, war a bleift, ass d'nächst Joer op 290 Milliounen Euro, souwuel Investissementer wéi Fonctionnementskäschtchen. Dat si ganz vill Suen. Doduerch entstinn 8.000 zousätzlech Plazen, déi wichteg si fir eng ganz Rei Familjen, fir d'Kombinatioun vu Beruf a Famill matenee kënnen ze verbannen.

Mir wëllen, dass d'öffentlech Fuerschung op engem héijen Niveau bleift, well vun der Fuerschung gesäit een net haut direkt den Effet, mä et gesäit een en an der wirtschaftlecher Entwécklung an e puer Joer. D'öffentlech Fuerschung wiisst op 270 Milliounen Euro. Dat sinn 0,6% vun eise Bruttoinlandsprodukt. An ech soen lech, viru fënnf Joer - dat ass jo nach net ganz laang hier - war se bei 0,3%. Dat heescht, mir investéieren do, wou mer hoffen, dass duerch e puer gescheit Leit, déi mer ënnerstëtzen, enges Daags nei Iddien entstinn, déi zu neien Aarbechtsplaze kënnen féieren.

Mir mussen d'Land weiderentwéckelen an duerfir ass et och noutwendig, dass mer héich